

Abriendo espaciu



PA LA CREACION DEL LLAR LA LLEGRA N'UVIÉU -ASTURIES-

abriendo espaciu // pa la creación del llar la llegra n'uviéu *

La Llegra nació en febreru de 2014 dientro del CSOA La Madreña col oxetivu de convertise nun llugar pal alderique y l'acción a comuña de la izquierda soberanista asturiana. Tres dellos meses de xenerar idees y desendolcar propuestes, d'axuntar sensibilidaes, d'interrellacionanos con otres persones y colectivos... aportó la especulación y mandó parar.

La llóxica vertical, homoxeneizadora, neoliberal y patriarcal impúnxose a la nuestra propuesta colectiva, al nuestro modelu horizontal de construyir rellaciones humanes, cultura y ociu pa toes aquellos que nun queremos baillar al so son. Desagospieron el CSOA La Madreña en xunu. Pero suel dicise que los suaños nun se puen desagospiar; por eso **La Llegra va abriendo espaciu**.

Queremos siguir teniendo un llar autoxestionáu n'Uviéu. Un puntu d'alcuentru nel que xenerar alderique, discursu y trabayu colectivu; nel que visibilizar y normalizar a la izquierda soberanista asturiana: plural y abiertu a otros movimientos sociales y culturales; participativu y xestionáu horizontalmente ente toles persones que quieran formar parte d'él.

Queremos tresformar Asturias; y que'l llar La Llegra seya una semiente que faiga pol cambiu políticu, social y económicu que necesitamos pal futuru del nuestro país y pa construyir otru mundu posible.

llar la llegra. cai postigu baxu, 40 // qué vamos facer nel llocal *

N'Uviéu, na cai Postigu Baxu 40, va asitiase'l llocal de La Llegra. Un espaciu que nagua por ser:

Un **puntu d'alcuentru** ente toles **persones y organizaciones** que formen parte de la **izquierda soberanista asturiana**.

Un espaciu d'**alderique**, de xeneración de **discursu**, de **trabayu colectivu**.

Un llocal participativu, xestionáu horizontalmente ente les persones que quieran formar parte d'él.

Un espaciu **plural**; **abiertu** a xente d'otros **movimientos sociales, culturales y políticos** del ámbitu de la **izquierda** y del **asturianismu** cultural.

Un **escaparate** col que **normalizar y da-y visibilidá** a la izquierda soberanista asturiana.

Un llugar pa la **dinamización social** nel que desendolcar **charres, conciertos, talleres, proyecciones, xintes...**

Un llar d'**ociu y socialización**, de construyir **rellaciones horizontales** ente les persones qu'entren nél a echar un bon ratu.

Un llocal col que rellacionanos col vecindariu y nel qu'**empobinar iniciatives pal barriu** que se reflexen na construcción d'un modelu de ciudá más **participativu y popular**.

Un sitiu nel que **potenciar la industria cultural** asturiana al traviés de la **venta de llibros y discos**; amás de distribuir **materiales de colectivos** sociales asturianos.

Un espaciu pa **construyir soberanía alimentaria** dando-y puxu al consumu de **productos ecolóxicos** producidos nel país.

Una **fonte de financiación** pal trabayu de la izquierda soberanista asturiana.



inauguración del espaciu la llegra



bloque soberanista nel 1u mayu



prohibición del actu pol 25 mayu



parrillada popular en noreña



pañuelos en san mateo



contra los premios príncipe d'asturies



cartelu manifestación 8 setiembre

espaciu la llegra // quién somos y qué ficimos hasta agora *

La Llegra nació como un espaciu dientro del CSOA La Madreña d'Uviéu col oxetivu de llegar a ser un puntu d'alcuentru y llugar d'alderique pa la esquierda soberanista asturiana, caracterizada históricamente pola división ente les distintes corrientes y les dificultaes pa conectar cola sociedá.

Mentanto duró l'espaciu dientro de La Madreña, desendolcamos les siguientes actividaes.

Folixa/presentación del Espaciu La Llegra

Charra sobre soberanía enerxética y proyección de "Cenizas del cielo"

Colaboración con Ixúx Asturies-Euskal Herria elkarte a nel so primer aniversariu

Proyección del documental "Whore's glory"

Presentación del llibru "La huerta ecológica asturiana"

Alderique sobre soberanía alimentaria y proyección del curtiiu "Tiempu de medrar"

Conciertu del Día les Lletres Asturianas con Vrienden y La Kuruxa 2.0

Convocatoria de concentración (prohibida por Delegación de Gobiernu) n'alcordanza a los fechos del 25 de mayu de 1808

En xunu una orden xudicial desagospia'l CSOA La Madreña, pero les persones y colectivos que participamos en La Llegra seguimos cola nuestra actividá. Nestos meses tuvimos, sacando alante una bayura d'actividaes y debatiendo cuestiones que nos esmolecen. Dalgunes d'elles son:

Parrillada popular en Noreña

Organización de la manifestación y de los actos unitarios del 8 setiembre

Edición de pañuelos por unes fiestes populares en San Mateo 2014

Charra alrodiu'l referéndum d'independencia n'Escocia y folixa nel Centru Social La Llume

los bloques soberanistes // construyendo unidá popular dende abaxo *

D'ente tol trabayu fechu, destaca la esperiencia de #LLuchandoPolaSoberanía. Esti bloque soberanista surge al calor de la movilización convocada pol sindicalismu alternativu'l 1u de Mayu, pa la que se convoca un conceyu abiertu a tola izquierda soberanista asturiana col finxu d'algamar la presencia conxunta de persones, sensibilidaes y organizaciones con un mensaxe común.

El procesu, caracterizáu pola horizontalidá, decide dir al 1u Mayu como bloque #LLuchandoPolaSoberanía col subllema "Techu, tierra, trabayu, pan, salú, educación, independenciu, llibertá, xusticia y paz", siendo un éxitu de participación tanto en númeru de persones como n'organizaciones polítiques, xuveniles y estudiantiles que sofitaron la iniciativa.

Especial importancia tuvo'l 8 de setiembre. Coincidiendo col día oficial d'Asturies, la iniciativa #LLuchandoPolaSoberanía volvió a pasar de ser un bloque a convocar una manifestación qu'axuntó n'Uviéu cientos de persones col llema "Pa tresformar Asturias", nuna xornada con actos políticos y d'espardimientu. Ye destacable la participación nesta movilización, amás de les organizaciones soberanistes, de movimientos como la Plataforma Feminista d'Asturies, la Corriente Sindical d'Izquierda, Asamblees de Trabayadores en Llucha, y l'Asamblea de Para@s y Precari@s.

La suma de too supón una esperiencia granible d'unidá popular y d'acumulación de fuerces de la izquierda soberanista dende abaxo, con una dinámica conscientemente ayena a posibilismos y electoralismos, y entemeciendo tanto la participación d'organizaciones "tradicionales" –caracterizaos per años pola so división–, como de persones ensin militancia o pertenecientes a movimientos sociales de toa triba. Too ello dende unos parámetros de voluntá de tresformación social dende'l marcu nacional específicu que ye Asturias.

Anguaño, pue falase d'una dinámica consolidada que dinamiza, da presencia y visibilidá a la óptica soberanista en too tipu de movilizaciones populares d'Asturies.



charra sobre soberanía enerxética



xuegos tradicionales na folixa posterior a la manifestación del 8 setiembre



contra'l desagospiu de la madreña



tablón de convocatories nel llocal



bloque soberanista antitaurinu



cartelu concentración n'alcordanza 25 mayu

necesitamos el vuestro sofitu //

campaña de crowdfunding y de cuotes voluntaries p'asegurar la vidabilidá económica del llar la llegra *

Agora l'enfotu sigue siendo'l mesmu: visibilizar el nuestru pensamientu, construyir un discursu nuevu qu'evolucione al mesmu ritmu que lo fai la sociedá asturiana y abrir pa toes un espaciu nel que medrar. Esto último ye lo que tamos a puntu d'algamar. Yá tenemos el llocal, tenemos les idees, tenemos les ganés. Agora namás necesitamos el to sofitu y que nos ayudes a qu'esti espaciu seya vidable económicamente.

¿Échesnos un gabitu? Pues facelo de dos formes: col crowdfunding y coles cuotes voluntaries.

crowdfunding //

3000 euros pa facer les obres necesaries *

Necesitamos axeitar l'espaciu, por eso queremos algamar los 3000 euros colos que face-y frente a la obra.

Pa too esti procesu arrancamos una procesu de financiación colectiva al traviés de la plataforma verkami.com.

Pues colaborar aportando dende 10 euros hasta 300 euros. A toles persones que nos echéis un gabitu se vos va agradecer con distintes recompenses.

[tenéis tola información nesti enllaz: <http://goo.gl/Bkojaa>]

Llicencia d'obra _____	350 €
Permisos _____	200 €
Documentación técnica y planimetría ____	150 €
Demolición + medios auxiliares _____	400 €
Remates d'alcuentros en suelos y techu _	200 €
Suelu nuevu _____	200 €
Cierre metálicu _____	500 €
Pintura y otros materiales _____	350 €
Instalación llétrica _____	1000 €
TOTAL _____	3000 €



abriendo espaciu //

mira'l videu del crowdfunding en youtube



 EspaciuLaLlegra  La_Llegra

 espaciulallegra@gmail.com

cuotes voluntaries //

aportaciones pa caltener el llocal mes a mes *

El Llar La Llegra ye un proyectu autoxestionáu que tien que facer frente una cantidá de gastos mensuales (alquiler, factures, materiales de difusión...).

Tamos entamando a facer camín y soles nun somos a ello. Por eso tamos a la gueta de xente que quiera colaborar económicamente col llocal pa que, mes a mes, vaiga afitándose esti nuevu espaciu.

Si quies sofitar a La Llegra nesta xera, pues rellenar esti cuestionariu (tranquilidá, nun ye un contratu!) y asina podremos tar en contacto.

nome y apellíos / corréu electrónicu / conceyu

¿Cuántes perres pues poner al mes?

Nun pueo sofitar económicamente, pero quiero colaborar no que pueda con La Llegra

2 euros / 5 euros / 10 euros / 20 euros / 50 euros

Nun sé, pero quiero sofitar el proyectu

¿Cómo prefieres pagalo?

En mano nel llocal

Per domiciliación en cuenta bancaria

¿Quiés colaborar d'otres formes?

Non too son perres, hai munches formes de sofitar:

Tengo tiempu llibre pa participar en La Llegra

Puedo desendolcar dalguna actividá

Nun tengo muncho tiempu o vivo lloñe, pero intentaré averame a los conceyos